

菩薩應勤修精進

——「大智度論」集粹之十六——

智銘

佛曰：身心精進不懈怠故，應具足毗梨耶波羅蜜。「毗梨耶」譯爲「精進」。精進是一切善法本，應在最初演說，何以居於布施、持戒、忍辱之後演說。蓋布施、持戒、忍辱，世間常有，如客主之義，法應供給，乃至畜生亦知布施，或有人種種因緣，故能布施。若爲今世，若爲後世，若爲道故布施，不須精進。如持戒者，見爲惡之人，王法治罪，便自畏懼，不敢爲非。或有性善，不作諸惡，有人聞今世作惡，後世受罪，而以怖畏，故能持戒。有人聞持戒因緣故，得離生、老、病、死，是中心生、口言：我從今日不復殺生。如是等即是戒。豈須精進波羅蜜而能行耶？如忍辱中，若罵、若打、若殺，或畏故不報，或少力，或畏罪，或修善人法，或爲求道故，默然不報，皆不必須精進波羅蜜乃能忍也。今欲得知諸法實相，行般若波羅蜜，修行禪定。禪定是智慧之門，是中應勤修精進，一心行禪。

欲成佛道，凡有二門：一者、福德，二者、智慧。行施、戒、忍，是爲福德門。知一切諸法實相，摩訶般若波羅蜜，是爲智慧門。菩薩入福德門，除一切罪，所願皆得。若不得願者，以罪

垢遮故。入智慧門則不厭生死，不樂涅槃，二事一故。今欲出生摩訶般若波羅蜜，般若波羅蜜要因禪定門，禪定門必須大精進力。何以故？欲戒亂心，不能得見諸法實相。而禪定、智慧，不是福願所能求，亦非粗觀所能得，須身、心精勤，急著不懈，方能成辦。能得禪定、智慧，則衆事皆辦，以是故，精進第四演說，是爲禪定、實智慧之根。

佛道甚深難得，雖有布施、持戒、忍辱力，更須精進，得甚深禪定、智慧，及無量諸佛法。若不行精進，則不生禪定，禪定不生，則不得生梵天王處，何況欲求佛道？欲成佛道，要須勤大精進。若人欲自度身，尙當勤急精進，何況菩薩誓願欲度一切，尙更須勤精進，精進法是一切諸善法之根本，能出生一切諸道法。乃至阿耨多羅三藐三菩提。一切諸善法，乃至阿耨多羅三藐三菩提，皆從精進不放逸生。雖有先世福德因緣，若無精進則不能生，乃至今世利尙不可得，何況佛道？諸大菩薩荷負衆生，受一切苦，乃至阿鼻泥犁中苦，心亦不懈，是爲精進。懈怠之心，燒諸功德，譬如大火，能燒諸林野，如是等種種觀懈怠之罪，精進

即能增長。

菩薩知一切諸法，皆空無所有，而不證涅槃，憐愍衆生，集諸善法，是精進波羅蜜力。以精進力故，能破魔軍及結使賊，得成佛道。既得佛道，於一切諸法，一相無相，其實皆空，而爲衆生說諸法種種名字，種種方便，度脫衆生，生、老、病、死苦。佛告阿難：人能愛樂修行精進，無事不得，得至佛道，終不虛也。如是種種因緣，觀精進利而得增益。如是精進，似有時說爲欲，或時說精進，有時說不放逸。譬如人欲遠行，初欲去時，是名爲欲，發行不住，是爲精進，能自勸勵，不令行事稽留，是爲不放逸。以是故，知欲生精進，精進生故不放逸，不放逸故能生諸法，乃至得成佛道。菩薩欲脫生、老、病、死，欲度脫衆生，常應精進，一心不放逸。一心不放逸，大得名利，一心不放逸，身得安隱，一心不放逸，所遇皆得。專修方便，常行不廢，能破煩惱結使山。菩薩修諸苦行，若有人來求索頭目、髓腦，盡能與之。而自念言：我有忍辱、精進、智慧，方便之力，受之尚苦，何況愚昧三塗衆生？我當爲此衆生故，勤修精進，早成佛道而度脫之。

於事必能，起發無難，志意堅強，心無疲倦，所作究竟，如是等名爲精進相。佛說：精進相者，身、心不息故。於善法中，初夜、中夜、後夜，誦經、坐禪，求諸法實相，不爲諸結使所覆，身、心不懈，是名精進相。是精進，名心數法，勤行不住相，隨心行，共心生；或有覺有觀，或無覺無觀，或無覺有觀，如阿毗曇法廣說。於一切善法中，勤修不懈，是名精進相。於五根中，名精進根。根增長名精進力。心能開悟，名精進覺。能到佛涅槃，是名正精進。四念處中，能動繫心，是精進分。四正勤，是精進門。四如意足中，欲精進是精進，六波羅蜜中，名精進波羅蜜。

初發心菩薩，於一切善法中精進，漸漸次第得精進波羅蜜。爲佛道精進，名爲波羅蜜，諸餘善法中精進，但名精進，不名波羅蜜。波羅蜜名到彼岸，世間人及聲聞、辟支佛，不能具足行精進，是故不名爲波羅蜜。是人無大慈、大悲，棄捨衆生，不求十

力、四無所畏，十八不共法、一切智，及無礙解脫、無量身，無量光明、無量音聲，無量持戒、禪定、智慧等諸善行。以是故，是人精進不名波羅蜜。

菩薩精進，不休、不息，一心求佛道，如是行者，名爲精進波羅蜜。菩薩難爲能爲，是爲菩薩精進波羅蜜。菩薩以精進力爲首，行五波羅蜜，是時，名爲菩薩精進波羅蜜。但行精進，不能五波羅蜜，是不名菩薩精進波羅蜜。菩薩精進，不爲財利、富貴、力勢，亦不爲身，不爲生天、轉輪聖王、梵、釋、天王，亦不自爲以求涅槃，但爲佛道，利益衆生。如是相，名爲菩薩精進波羅蜜，菩薩精進，修行一切善法，大悲爲首、大慈爲首、實相智慧爲首，行六波羅蜜，是名菩薩精進波羅蜜。

菩薩觀衆生以種種結使業因緣故，輪轉五道，受諸畜生禽獸之苦，生大悲心：我於衆生爲無所益，雖與世樂，樂極則苦，當以佛道涅槃常樂，益於一切。當勤大精進，乃得實智慧，得實智慧知諸法實相，以餘波羅蜜助成，以益衆生，是爲菩薩精進波羅蜜。

菩薩精進，世世勤修，求諸財寶，給施衆生，心無懈廢。自有財物，能盡與施，心亦不懈。精進持戒，若大若小，一切能受，一切能持，不毀、不犯。勤修忍辱，若人刀杖打害，罵詈毀辱，及恭敬供養，一切能忍，不受、不著，於深法中，其心不沒，亦不疑悔。專精一心，修諸禪定，能住能學，得五神通，及四無量心，八勝處，八背捨，十一切處，是諸功德，得四念處及諸菩薩見佛三昧。

菩薩精進求法，不懈身、心，勤力供養法師，種種恭敬供給，給使，初不違失，亦不廢退，不惜身命，以爲法故。誦讀問答，初、中、後夜，思惟憶念，籌量分別，求其因緣，選擇同異，欲知實相：一切諸法自相、異相，總相、別相，一相，有相、無相，如實相，諸佛菩薩無量智慧，心不退不沒，是名菩薩精進。如是等種種因緣，能生辦種種善法，是故名爲精進波羅蜜。

菩薩生身，法性身，能具功德，是爲精進波羅蜜滿足。精進是心數法，但從身力出，名爲身精進。如受是心數法，而有五識

相應受，是名身受，意識相應受，是名心受。精進亦如是，身力勤修，若事布施，口誦法言，若講說法，如是等名爲身精進。行布施、持戒，是爲身精進。忍辱、禪定、智慧，是名心精進。外事勤修，是爲身精進，內事專精，是爲心精進。粗精進名爲身，細精進名爲心。爲福德精進名爲身，爲智慧精進是爲心。若菩薩初發心，乃至得無生忍，從是中間名爲身精進。生身未捨故，得無生忍，捨肉身得法性身，乃至成佛，是爲心精進。

菩薩初發心時，功德未足故，種三種因緣：布施、持戒、善心，漸得福報以施衆生。衆生未足，便廣修福，發大悲心：一切衆生不足於財，多作衆惡，我以少財不能滿足其意，其意不滿，不能勤受教誨，不受道教，不能得脫生、老、病、死，我當作大方便，給足於財，令其充滿。能集財寶以用布施，是爲身精進，以是布施之德，得至佛道，是爲心精進。生身菩薩行六波羅蜜，是爲身精進，法性身菩薩行六波羅蜜，是爲心精進。一切法中，皆能成辦，不惜身命，是爲身精進，求一切禪定、智慧時，心不懈倦，是爲心精進。身精進者，受諸勤苦，終不懈廢。

菩薩精進，心無厭足，菩薩志願宏曠，誓度一切，衆生無盡，是故精進亦不可盡。雖得至佛，衆生未盡，不應休息。十八不共法中，欲及精進，二事常修。菩薩不住法住般若波羅蜜中，不廢精進，是菩薩精進，非佛精進。菩薩未得菩薩道，生死身以好事故，衆生反更以不善事加之：或有衆生，菩薩讚美反更毀辱，菩薩恭敬而反輕慢，菩薩慈念反求其過，謀欲中傷。此等衆生，無有勢力，來惱菩薩。菩薩於此衆生，發宏誓願，我得佛道，要當度此惡中之惡諸衆生輩。於此惡中，其心不懈，生大悲心，譬如慈母憐其子病，憂念不捨。如是相，是爲菩薩精進。

菩薩行布施波羅蜜時，十方乞兒來欲求索，不應索者皆來索之，及索所重難捨之物。語菩薩言：與我兩眼，與我頭腦、骨髓，及諸貴寶珍物，如是等難捨之物，乞者強索，其心不動，慳瞋不起，見疑心不生，一心爲佛道的布施，譬如須彌山，四方風吹所不能動。如是種種相，是名精進波羅蜜。

菩薩行出世間般若，於持戒、布施心不染著，何以故？施者

、受者，所施財物，於罪、不罪，於瞋、不瞋，於進於怠，攝心散心，不可得故。菩薩行精進波羅蜜，於一切諸法，不生不滅，非常非無常，非苦非樂，非空非實，非我無我，非一非異，非有非無，盡知一切諸法，因緣和合，但有名字，實相不可得。菩薩作如是觀，知一切有爲，皆是虛誑，心息無爲，欲滅其心，唯以寂滅爲安隱。爾時，念本願憐愍衆生故，還行菩薩法，集諸功德。菩薩自念：我雖知諸法虛誑，衆生不知是事，於五道中受諸苦痛，我今當具足行六波羅蜜。菩薩得生報神通，亦得佛道，三十二相，八十種好，一切智慧，大慈大悲，無礙解脫。十力，四無所畏，十八不共法，三達等無量諸佛法。得是法時，一切衆生皆得信淨，皆能受行愛樂佛法，能辦是事，皆是精進波羅蜜力。是爲精進波羅蜜。

如佛說：菩薩精進，不見身，不見心，身無所作，心無所念，身、心一等而無分別。所求佛道以度衆生。不見衆生爲此岸，佛道爲彼岸，一切身、心所作放捨，如夢行爲，覺無所作。是各寂滅諸精進故，名爲波羅蜜。所以者何？知一切精進，皆是邪僞故。以一切作法，皆是虛妄不實，如夢如幻，諸法平等，是爲真實。平等法中，不應有所求索，是故知一切精進皆是虛妄。雖知精進虛妄，而常成就不退，是名菩薩真實精進。

如佛言：我於無量劫中，頭目、髓腦以施衆生，令其願滿。持戒、忍辱、禪定時，在山林中，身體乾枯，或持齋節食，或施諸色味，或忍詈辱，刀杖之患，是故身體焦枯。又常坐禪，曝露勤苦以求智慧，誦讀思惟，問難講說一切諸法，以智分別好惡粗細，虛寶多少。供養無量諸佛殷勤精進求此功德，欲具足五波羅蜜。我時未有所得，不得檀、尸、羸、精進、禪、智慧波羅蜜。見燃燈佛，以五華散佛，布髮泥中，得無生法忍，即時六波羅蜜滿，於空中立，讚燃燈佛，見十方無量諸佛，是時，得實精進。身精進平等故，得心平等，心平等故。得一切諸法平等，如是種種因緣相，名爲精進波羅蜜。